



KAMP-LINTFORD

Karabeg: Osnivač Nogometnog kluba „Rudar“

Turnir u znak sjećanja na Elmedina Karabega

Medo je iza sebe ostavio mnogo toga

Svi smo ponosni što smo ga poznavali, kaže Ismet Merdanović, biznismen iz Kamp- Lintforda • Poziv ljubiteljima sporta da dođu na turnir

Za Nogometni klub „Rudar“ iz njemačkog grada Kamp-Lintford februar je izuzetno tužan mjesec, jer su se u njemu oprostili od svog predsjednika i prijatelja Elmedina Karabega, poznatijeg pod nadimkom Medo. Naime, Medo je usljed teške i neizlječive bolesti preselio na ahiret, ali je iza sebe ostavio dosta toga što će pamtili mnoge generacije.

U znak sjećanja na rahmetli Elmedina Karabega Medu, klub „Rudar“ odlučio je da svake godine organizira turnir u malom nogometu.

- Ovim turnirom, koji će postati tradicionalan, želimo da se sjetimo predsjednika kluba, našeg Mede, iza kojeg je ostala velika praznina, ali i spoznaja da smo svi ponosni što smo ga

poznali. On je bio i osnivač kluba „Rudar“ i svojom dobrotom i otvorenošću privukao je veliki broj omladine. Bio je organizator mnogih turnira i teferiča i na taj način se također trudio da klub opstane. Imao je širok krug prijatelja i poznanika, a tim prijateljstvima i poznanstvima spajao je mnoge ljude, klubove i gradove. Ovaj turnir bit će živa uspomena na Elmedina Karabega Medu i nikada ga niko od nas neće zaboraviti. Pozivam sve ljubitelje fudbala da se u što većem broju odazovu ovom turniru i da svojim ekipama uveličaju ovaj naš turnir i sjećanje na Medu - rekao nam je Ismet Merdanović, istaknuti bh. biznismen iz Kamp-Lintforda.

B. ŠIŠIĆ

Klub „Rudar“ e. V. u nedjelju, 14. 2. 2010. godine organizira turnir u malom nogometu, sjećanje na Elmedina Karabega

Početak u 10 sati

Adresa: Glückaufhalle, Moerserstrasse 167, 47475 Kamp - Lintford

Prijave na broj mob: 0172 713 48 31 - Emir Krupić

Prijava po ekipi 50 eura

PROZOR Elmedin Motika uspješno izliječen

U razredu s oduševljenjem dočekali njegov povratak

Borba za život trajala dvije i po godine • Operiran na Klinici za neurohirurgiju u Sarajevu • Predstoji dugotrajna rehabilitacija

Neizmjerne radost i oduševljenje na licima učenika 7. razreda OŠ „Alija Isaković“ u Prozoru moglo se čitati prije nekoliko dana kada se na vratima učionice pojavio njihov drug Elmedin Motika. Doček je bio tako dirljiv da se otac Sabahudin jedva uzdržao da ne zaplače.

Prije dvije i po godine Elmedinu su ljekari utvrdili urođeni poremećaj pri čemu se zadnji vratni pršljen umjesto naprijed razvijao u suprotnom smjeru, pritiskao mali mozak i time u opasnost dovodio njegov život. Operativni zahvat bilo je moguće izvesti samo na klinikama u Italiji i Australiji. Sve je bio spremno za odlazak u Australiju, ali čekanje se odužilo, a samo jači kašalj mogao je za Elmedina biti koban.

Zbog toga je školu napustio

Mnogi željeli pomoći

Nakon teksta u našem listu, prije dvije godine, javili su se brojni građani i organizacije sa željom da pomognu u Elmedinovu liječenju.



Elmedin (drugi s lijeva u prvom redu) s drugovima u razredu

na početku 5. razreda i sve do sada trajala je borba za njegov život.

- Sve je uspješno završeno zahvaljujući dr. Eldinu Burazeroviću sa Klinike za neurohirurgiju KCUS, kojem moja porodica izražava neizmjernu zahvalnost, jer je izveo veoma komplikovanu operaciju. Odstranjen je dio koji je stvarao probleme, od kosti kuka ugrađena je nova kost te ugrađene dvije metalne pločice, od kojih je jedna već odstranjena, koje daju stabilnost gornjem dijelu tijela. Sada predstoji dugotrajna rehabilitacija i Elmedin

mora najmanje dva puta godišnje ići u banju u Fojnicu - kaže Sabahudin.

Elmedin je zahvaljujući susretljivosti OŠ „Alija Isaković“ vanredno polagao 5. i 6. razred, te prvo polugodište 7. razreda. Ipak, vanredno polaganje nije isto što i redovna nastava, to znači i njegovi drugovi, pa svi nastoje da mu pomognu. Zdušno su prihvatili prijedlog razrednice Šefike Grcić i stalno s njim sjedi po neki od odlikaša koji mu pomažu da dostigne gradivo koje nije potpuno savladao.

H. MANOV

Bh. udruženje „Brent“ iz Londona

Ugostili generala Sakiba Forića

Druženju prisustvovala i ambasadorica BiH u Velikoj Britaniji Jadranka Negodić



Forić sa suprugom i ambasadoricom Negodić



Večera u bh. klubu „Brent“: Ugodno druženje

Proteklog vikenda rukovodstvo bh. kluba „Brent“ iz Londona u svojim prelijepim prostorijama ugostilo je generala vojske BiH Sakiba Forića sa suprugom Irmom te osoblje naše Ambasade u Londonu. Informaciju više potražili smo od predsjednika bh. udruženja „Brent“ Zaima Pašića, koji je za naš list re-

kao:

- General Forić boravi u Velikoj Britaniji na višemjesečnoj specijalizaciji. Ovom prilikom on je razgovarao s većinom naših članova Odbora i profesionalnim radnicima o djelovanju našeg udruženja u Londonu, kao i o uspjesima u ustrojstvu našeg Ministarstva odbrane.

Rukovodstvu naše organizacije bilo je posebno drago što se i ovom prilikom ambasadorica BiH u Velikoj Britaniji Jadranka Negodić sa svojim saradnicima Jasminom Turajlić, Mensurom Jusićem i Draganom Kneževićem odazvala pozivu za druženje koje je trajalo do kasno u noć.

N. A. K.